

**Акафист Пресвятей Богородице
в честь чудотворныя иконы Ея,
«Неупиваемая Чаша» именуемая**

Кондак 1, глас 8, подобен: Взбранной Воеводе:

Изрядное и дивное вспоможение нам даровася,
образ Твой честный, Богородице Дево,
яко избавльшеся явлением его
недугов душевных и телесных и скорбных обстояний,
благодарныя хвалы приносим Ти, всемилостивая Заступнице.
Ты же, Госпоже, приклонися благоутробно
к нашим воздыханием и воплем сердечным,
и исцеление подаждь страждущим, да с верою воззовем Ти:
Радуйся, Владычице, Неупиваемая Чаше,
духовную жажду нашу утоляющая.

Икос 1

Ангельстии чини и праведников сонми непрестанно славят Тя, Царицу Богородицу,
ходатаицу о роде человечестем, в беззаконных погруженнем и во гресех пребывающем,
даруеши бо нам во утешение и спасение милость Свою чрез чудотворныя иконы Твоя, ихже,
яко звезды небесныя, по всей земли нашей зрим. Ко единому же от сих образов,
Неупиваемая Чаша именуемому, припадающе, из глубины сердца взываем Ти:

Радуйся, неприступнаго Божества селение;
радуйся, непрестанное человеков удивление.
Радуйся, скорбьми грехи наша очищающая;
радуйся, печальми наша немощи врачующая.
Радуйся, милость Свою нам свыше посылающая;
радуйся, скорбная сердца наша веселящая.
Радуйся, пречудное всех с Богом примирение;
радуйся, муки вечныя известное избавление.
Радуйся, Владычице, Неупиваемая Чаше, духовную жажду нашу утоляющая.

Кондак 2

Видящи, Пречистая Владычице, скорби сердечныя, муки душевныя, покаяние
искреннее человеков, губительным пороком пьянства одержимых, благоволила еси даровати
богоспасаемому граду Серпухову милость Твою явлением пречуднаго образа Твоего, да вси,
с верою и сокрушенным сердцем к нему припадающии и исцеление от тяжкаго недуга своего
обретающии, усердно вопиют Богу: Аллилуия.

Икос 2

Разумев трикратное явление преподобнаго Варлаама и повеление от него во град
Серпухов шествовати, человек некий, страстию пьянства одержимый, обрете тамо в
монастыре икону Твою святую, Неупиваемая Чаша именуемую. Мы же, видяще таковое о
нас, грешных, попечение, со благоговением воспеваем Ти таковая:

Радуйся, славу чудес Твоих грешным открывающая;
радуйся, Путеводительнице, путь благий им являющая.
Радуйся, ко спасению нас привлекающая;
радуйся, благодарению нас научающая.
Радуйся, скорби наша в радость претворение;
радуйся, несумненною надеждою возвеселение.
Радуйся, губительныя страсти потребляющая;
радуйся, благим намерением пособствующая.

Радуйся, Владычице, Неупиваемая Чаше, духовную жажду нашу утоляющая.

Кондак 3

Сила Вышняго благодатию Владычицы укрепи некоего человека, недугом пьянства страждущаго, егда той, расслаблене имый ноге, потщася града Серпухова достигнути, повеление Богородицы, чрез преподобнаго Варлаама реченное, исполняя. Обрет же во граде сем икону Пречистыя Богоматере, абие исцеле от недуга своего, душевнаго и телеснаго, и с трепетом воззва Богу: Аллилуия.

Икос 3

Имуще источник неоскудеваемый, неупиваемую чашу небесных дарований, не токмо людие града Серпухова, но и вси православнии христиане от иных градов и весей, к Твоему пречудному образу притекающе и пред сим исцеления обретающе, благодарными усты вопиют Ти сице:

Радуйся, Еюже скорби наша потребляются;

радуйся, Еюже радость спасения изливается.

Радуйся, немощи душевныя и телесныя врачующая;

радуйся, страсти молитвами Твоими укрощающая.

Радуйся, коемуждо просящему полезная дарующая;

радуйся, безчисленныя щедроты всем подающая.

Радуйся, милости сокровище нам отверзающая;

радуйся, милосердие к падшим являющая.

Радуйся, Владычице, Неупиваемая Чаше, духовную жажду нашу утоляющая.

Кондак 4

Бурю внутрь имуща помышлений сумнительных, обаче с покаянием искренним к Твоему неизреченному милосердию притекающе, пьянственную страстию одержимии исцеление получают, и от всея души зовут рожденному от Тебе Спасителю нашему: Аллилуия.

Икос 4

Слыша Господь тяжкия скорби, вопли и плач жен, стариц, детей, ихже сродницы обуреваемы суть пьянственную страстию или безумием наркотическим одержимии, дарова им, Пренепорочная, Твою икону, от неяже вси просящии утешение и радость духовную обретают, и вопиют Ти со слезами таковая:

Радуйся, Агнице, Агнца рождающая, грехи мира вземлющаго;

радуйся, Чаше, от источника бессмертия черплющая.

Радуйся, матерей скорбных укрепление;

радуйся, ненадежных благое надеяние.

Радуйся, притекающих к Тебе благодатное охранение;

радуйся, скорбящих отрадо и утешение.

Радуйся, волнение страстей в нас усмиряющая;

радуйся, руку помощи требующим простирающая.

Радуйся, Владычице, Неупиваемая Чаше, духовную жажду нашу утоляющая.

Кондак 5

Боготечную звезду, честную икону Твою, показала еси нам, Владычице мира, юже зряще и с верою сердечною молящася Тебе, Богородице, глаголем: пьянством и иными недуги душевными или телесными страждущия исцели, верныя же научи воспевати хвалу Богу: Аллилуия.

Икос 5

Видяще чудеса преславная и знамения пречудная, не токмо от иконы Твоя, Богомати, во граде Серпухове явленныя, бываемая, но и от яже по подобию сея иконы изображений, припадающе к ним, смиренно глаголем Ти:

Радуйся, притекающих к Тебе скорая Предстательнице;
радуйся, молений наших благосердная Услышательнице.
Радуйся, град Серпухов благословением Твоим осенившая;
радуйся, в пределах московских славу чудес Твоих явившая.
Радуйся, сокровище исцелений неоскудеваемое;
радуйся, воздержником всемогущая Покровительнице.
Радуйся, противу мира и диавола подвизающимся Споспешнице;
радуйся, в мире благочестно живущих усердная Заступнице.
Радуйся, Владычице, Неупиваемая Чаше, духовную жажду нашу утоляющая.

Кондак 6

Проповедующе чудеса Твоя, Богородительнице, молим Тя, Пречистая, со слезами: избави всех нас от пагубнаго к винопитию пристрастия и от падений греховных, подвизающи воспевати Богови: Аллилуия.

Икос 6

Возсия светлость Божественныя славы от иконы Твоя, Дево Богоотроковице, идеже Господь наш Иисус Христос яко младенец зрится, образ Таин Своих Пречистых нам являй, и от страстей мерзких с верою притекающим избавление дарует. Мы же Тебе, Пречистой Его Матери, выну о нас Сына Своего умоляющей, гласы немолчныя приносим сицевыя:

Радуйся, яко о Тебе радуется ангельский собор;
радуйся, яко о Тебе торжествует человеческий род:
Радуйся, похвалы небесныя и земныя славою превосходящая;
радуйся, рожденнаго Тобою Агнца нам дивно показующая.
Радуйся, ко вратом жизни вечныя приводящая;
радуйся, от источника нетления жаждущия напаяющая.
Радуйся, от падений греховных возстающая;
радуйся, неиссякаемою благодатию никогоже оставляющая.
Радуйся, Владычице, Неупиваемая Чаше, духовную жажду нашу утоляющая.

Кондак 7

Хотя человек некий возблагодарити Тя, Владычице, исцеления ради от недуга пьянственнаго, украси Твою, Богомати, пречудную икону, во граде Серпухове пребывающую, со благодарением воспевая Богу: Аллилуия.

Икос 7

Дивная чудеса видим, Пречистая, от иконы Твоя святыя: страстию пьянства страждущии, к Твоему матернему предстательству прибегающе, от тяжкаго недуга своего избавляются, и хвалу Тебе приносяще, зовут таковая:

Радуйся, живоносный источниче исцелений;
радуйся, купеле небесная божественных дарований.
Радуйся, реко исцелений приснотекущая;
радуйся, море, страсти наша потопляющее.
Радуйся, во грехи впадшим надежду подающая;
радуйся, матернима рукама Твоима тех возстающая.
Радуйся, сердца благочестивых возвеселяющая;
радуйся, вся благая прошения наша исполняющая.
Радуйся, Владычице, Неупиваемая Чаше, духовную жажду нашу утоляющая.

Кондак 8

Странно и сумнительно неверующим слышати, како икона Твоя святая божественных исцелений источает струи. Мы же, оной благоговейно поклоняющесея, лобызаем ю, вопиюще Богу: Аллилуия.

Икос 8

Все упование страждущи недугом пьянства на Тя, Дево Чистая, возлагают: приклонися к немощем нашим, уврачуй страсти, кто бо нас грешных изведет из рова погибели, аще не Ты, Владычице? Сего ради, колена пред Твоим честным образом преклоньше, воспеваем Ти тако:

Радуйся, моления грешников не отвергающая;
радуйся, призывающим Тя небесную помощь ниспосылающая.
Радуйся, глубину милосердия Твоего грешным показующая;
радуйся, отчаянных и безнадежных ободряющая.
Радуйся, одержимым страстию пьянства поможение;
радуйся, терпеливых страдальцев благодатное утешение.
Радуйся, недугов наших благая Целительнице.
радуйся, от суеты мирския наша Охранительнице.
Радуйся, Владычице, Неупиваемая Чаше, духовную жажду нашу утоляющая.

Кондак 9

Всякое естество ангельское удивися делу Твоего милосердия, Господи, яко даровал еси грешному роду человеческому твердую Заступницу и Помощницу, к нашим немощем приклоняющуюся и от горькаго недуга пьянства свободяющую, верныя же научающую пети Тебе: Аллилуия.

Икос 9

Ветия многовещанная недоумеют восхвалити по достоянию дивное, Богомати, иконы Твоя явление, ниже мы, грешнии, от скверных устен наших возможем прославити заступницу нашу, якоже подобает. Обаче, душею и сердцем радуящесея, Тебе глаголем:

Радуйся, яко лик Твой священный являет чудеса;
радуйся, яко скорое еси посрамление отвергающих Тя.
Радуйся, от бед и скорбей присное ограждение;
радуйся, прибегающих к Тебе от зла сохранение.
Радуйся, кротким сиянием Твоим мглу страстей разгоняющая;
радуйся, души наша любовью к Тебе и Сыну Твоему исполняющая.
Радуйся, ко стезям покаяния премудрая Наставнице;
радуйся, добраго нам ответа пред Судиею Праведным Ходатаице.
Радуйся, Владычице, Неупиваемая Чаше, духовную жажду нашу утоляющая.

Кондак 10

Спасти хотящи многия, чудную икону Твою, Приснодево, пьянством недугующим даровала еси, да вси одержимии сею страстию к чудотворному образу Твоему притекают и, исцеление получивше, во умилении зывают Богу: Аллилуия.

Икос 10

Стена еси и щит, Богомати, пьянства недугом страждущим, и всем усердно к Тебе притекающим и икону Твою святую благоговейно чтущим, сию бо нам дарова благих Податель Господь в помощь и цельбу от губительных страсти, и тем наказует нам пети Тебе таковая:

Радуйся, врачеваний ложных грозное испровержение;
радуйся, благодати Врача Истиннаго к нам привлечение.

Радуйся, Твоею чистотою нашу скверну очищающая;
радуйся, Твоею благодатию наше недостойнство просвещающая.
Радуйся, естество наше тленное в нетление облакающая;
радуйся, моления наша Твоим предстательством укрепляющая.
Радуйся, от неможения нашего нас восстанавливающая;
радуйся, объемший нас облак страстей разгоняющая.
Радуйся, Владычице, Неупиваемая Чаше, духовную жажду нашу утоляющая.

Кондак 11

Пение наше смиренное, от любве и усердия Тебе приносимое, не презри, Чистая, и не отврати лика Твоего от страждущих недугом пьянства и отчаявшихся, но помози им и нам очиститься от всякия скверны греховныя, да возможем достойно и праведно пети Богу: Аллилуия.

Икос 11

Светоприемную свещу зрим Тя, Пресвятая Дево, Твой бо образ святыи лучами благодати Твоя мглу греховную прогоняет и на светлую стезю добродетелей наставляет с верою зовущих Ти таковая:

Радуйся, от суеты мира сего многомятежнаго нас изымающая;
радуйся, приращения страстей плотских отражати нам помогающая.
Радуйся, мысль благу в сердце наше полагающая;
радуйся, омраченную совесть нашу просвещающая.
Радуйся, мучительными недуги страждущих избавляющая;
радуйся, ко искреннему покаянию и исправлению призывающая.
Радуйся, души всех озлобленных укрепляющая;
радуйся, имя Твое славящих спасающая.
Радуйся, Владычице, Неупиваемая Чаше, духовную жажду нашу утоляющая.

Кондак 12

Благодать Божия, предстательством Твоим, о Богомати, подавается всем скорбящим, обездоленным, вдовам и старицам, наипаче же пьянственным недугом страждущим, и не тщи отходят сии, Пречистая, от неупиваемыя чаши божественных дарований Твоих, но неоскудно цельбы получающе, Всеблагая, благодарственно вопиют Богу: Аллилуия.

Икос 12

Поюще Твоя чудеса и велию милость, страстию пьянства одержимым явленную, молим Тя, Владычице, спаси и помилуй, и настави на стезю праву, и не остави нас, покрова Твоего ищущих и зовущих Ти:

Радуйся, росу милости Твоя нам низводящая;
радуйся, от пристрастия к хмельному питию свободящая.
Радуйся, от пьянственных страсти врачевание;
радуйся, в расслаблении сущим крепкое поможение.
Радуйся, гордыя смиряющая;
радуйся, смиренныя возвышающая.
Радуйся, малодушных дивное ободрение;
радуйся, благодушных велия радости.
Радуйся, Владычице, Неупиваемая Чаше, духовную жажду нашу утоляющая.

Кондак 13

О премилостивая Мати Сладчайшаго Господа нашего Иисуса Христа! Нынешнее наше услыши моление и избави нас от всех недугов душевных и телесных, наипаче же исцели

пьянством страждущия, да не во зле погибнут, но да спасеннии Тобою присно вопиют Богу: **Аллилуия.**

Сей кондак глаголи трижды, посем 1-й икос и 1-й кондак.

Молитва

О Премилосердая Владычице! К Твоему заступлению ныне прибегаем, молений наших не презри, но скоро исцели тяжким недугом пьянства одержимых братьий и сестр наших и того ради от матери своея, Церкви Христовы, и от спасения отпадающих. О Всемилостивая Мати Божия, коснися сердец их и скоро возстави от падений греховных, исцели я и ко спасительному воздержанию приведи. Умоли Сына Своего, Христа Бога нашего, да простит нам согрешения наша и не отвратит милости Своея от людей Своих, но да укрепит их в трезвении и целомудрии. Приими, Пресвятая Богородице, молитвы родителей, о чадах своих слезы проливающих; жен, о мужех своих рыдающих; чад, сирых и убогих, заблудшими оставленных, и всех нас, к иконе Твоей припадающих, – и да приидет сей вопль наш молитвами Твоими ко Престолу Всевышняго. Покрый и соблюди нас от лукаваго ловления и всех козней вражиих, в страшный же час исхода нашего помози пройти непреткновенно воздушная мытарства и молитвами Твоими избави вечнаго осуждения, да покрыет нас милость Божия во веки веков. **Аминь.**